

LISTOVI...

GRAČANIČKI GLASNIK
časopis za kulturnu historiju

Broj 46, godina XXIII
novembar, 2018. [str. 153-168]

© Monos 2018

Listovi gračaničkog kalendara od 13.5.2018. do 10.11.2018. godine

Prof. dr. Omer Hamzić

13. 5. 2018.

**Održan 21. festival dječjeg teatra BiH 2018. u
Gračanici**



Već po tradiciji, organizator Festivala je Bosanski kulturni centar Gračanica i Centar za dramski odgoj iz Mostara. Nakon odgledanih svih prijavljenih predstava, stručni žiri u sastavu: Bogdan Simić (Lutkarsko pozorište “Cvrčak”, Ugljevik), Mirela Trepanić (reditelj, Gračanica), Vahid Duraković (dramski pisac, Bugojno), odabrao je najbolje i dodijelio sljedeće nagrade i priznanja: (1) *Nagrada za predstavu u cjelini*, predstavi “Najbogatiji vrabac na svijetu” Katoličkog školskog centra “Sv. Josip” iz Sarajeva; (2) *Nagrada za scenski govor*, Dini Hamidoviću za ulogu pisca u predstavi “Najbogatiji vrabac na svijetu”, Katoličkog školskog centra “Sv. Josip” iz Sarajeva; (3) *Nagrada za ansambl igru* predstavi “Mali princ” u izvedbi Mostarskog teatra mladih, dječiji studio; (4) *Nagrada za uspješno kombinovanje formi po-*

LISTOVI...

kret-lutka-naracija, predstavi “Zlatna guska” DP “Eko Art” Bugojno; (5) *Nagrada za razigranu partnersku igru* za uloge kuhara i pomoćnika kuhara glumačkom paru: Ognjen Stojak i Katarina Petrović u predstavi “Trnoružica i hrabri vitez” Gradskog kazališta mladih Vitez; (6) *Nagrada za vizuelni identitet* predstavi “Alisa u zemlji čudesa” Katoličkog školskog centra “Sv. Franjo” Tuzla; (7) *Nagrada za funkcionalan izbor muzike* predstavi “Mali princ”, Mostarskog teatra mladih, dječiji studio; (8) *Druga nagrada za funkcionalan izbor muzike* predstavi “Alisa u zemlji čudesa” Katoličkog školskog centra “Sv. Franjo” Tuzla; (9) *Nagrada za najboljeg glumca festivala* za ulogu vrapca Čupavka Sinu Kurtu u predstavi “Najbogatiji vrabac na svijetu” Katoličkog školskog centra “Sv. Josip”, Sarajevo; (10) *Druga nagrada za najboljeg glumca festivala* za ulogu kapetana Piplfoksa, Davidu Popadiću u predstavi “Kapetan Džon Piplfoks” Ansambl “Male stvari” Trebinje; (11) *Nagrada za umjetničko – pedagoško vodstvo*, voditeljicama: Ani Dolić i Ivani Mostarac iz Katoličkog školskog centra “Sv. Josip” Sarajevo. (Izvor: BKC Gračanica)

16. 5. 2018.

Uništena kasetna avionska bomba iz Drugog svjetskog rata u mahali Ritašići

Aviobomba je bila zakopana u jednoj međi, u blizini kuće Ibrahima Ahmetaševića. Kako se radilo o eksplozivnom sredstvu sa tri upaljača u vrlo lošem stanju, primijenjena je metoda transporta do mjesta uništenja, oko 30 metara od mjesta gdje je bomba bila zakopana. Građani iz okolnih kuća i vozila su u vrijeme detonacije evakuirani na sigurnu razdaljinu, tako da je sve završeno bez problema. Operaciju su izveli stručnjaci Federalne uprave civilne zaštite. (Izvor: Dnevni avaz)

24. 5. 2018.

Memorijalni marš “Zečev gaj, 2018.”...

...u organizaciji Sportskog saveza Gračanica, činila je velika kolona mladih, uglavnom učenica i učenika MSS i Gimnazije, koji su pohodili mjesto jedne od najznačajnijih bitaka za odbranu Općine Gračanica, 25.. 5. 1992. Kolonu je ispratio načelnik općine Nusret Helić, a kod spomenika na Zečevom gaju okupljenima govorio natporučnik Nermin Duraković, jedan od učesnika bitke na Zečevcu.

24. 5. 2018.

U Gračanici premijerno prikazan dokumentarni film “Bajbaga – heroj bez ordenja”

Radi se o dokumentarnoj priči o ratnom heroju Hajrudinu Džebi – Bajbagi, jednom od prvih organizatora i neposrednih učesnika odbrane na području Stjepan Polja, koji je hrabro poginuo u bici na Zečevom Gaju, 24. 5. 1992. godine. U filmu dominiraju izjave i iskazi većeg broja sudionika sudbonosnih događaja od 23. – 25. 5. 1992. godine na širem području Stjepan Polja, Lendića i Malešića, u kojima je važnu ulogu imao Bajbaga. Film je prethodno doživio “pretpremijeru” u Osnovnoj školi Stjepan Polje. Inicijativu za snimanja filma pokrenula je neformalna grupa mladih iz Stjepan Polja. Podršku je pružilo Federalno ministarstvo za pitanja boraca i invalida Odbrambeno-oslobodilačkog rata. Kao autor filma potpisan je Sejdo Mejremić iz Stjepan Polja, a produkciju je radila Fondacija “Pravda” iz Sarajeva.

25. 5. 2018.

Svečano obilježen 25. maj, Dan odbrane općine Gračanica

Obilježavanje je započelo prijemom zlatnih ljiljana i komandanata ratnih brigada kod načelnika općine Gračanica, a nastavljeno polaganjem cvijeća na spomen-obilježju Odbrambeno-oslobodilačkog rata 1992.–1995.

Nakon što su brojne delegacije položile cvijeće i odale počast poginulim borcima, u Velikoj sali BKC-a održana je svečana akademija, na kojoj je prigodan govor održao načelnik općine Nusret Helić. U večernjim satima, upriličen je zajednički iftar za porodice šehida i poginulih boraca, zlatne ljiljane, komandante i mnoge druge zvanice.

29. 5. 2018.

“Pravednici među narodima” – najviše izraelsko državno priznanje pripadnicima drugih naroda koji su spašavali Židove tokom Holokausta posthumno dodijeljeno gračaničkim Prohićima: dr. Avdi, Esmi, Sabriji i Safeti.

Dodjela tih priznanja vezuje se za memorijalni centar “Yad Vashem”, posvećen čuvanju sjećanja na Holokaust, formiran 1953. godine. Na prijedlog ovoga centra i komisije imenovane od Vrhovnog suda Izraela od 1963. godine dodjeljuju se medalje Pravednika među narodima, koje mogu primiti samo ljudi koji nisu Jevreji i koji su za vrijeme Holokausta, pod opasnošću po vlastiti život, spašavali Jevreje. Do sada je u svijetu dodijeljeno preko 26.000, među kojima su i 53 Pravednika s područja BiH. U slučaju Gračanice, radi se o spašavanju djevojčice Nade Kolman koja već dugo godina živi sa porodicom u Australiji pod imenom Aviva Fox. Ovu malu Jevrejku, čijeg su oca Viktora strijeljali Nijemci, a bolesnu majku Helenu ubile ustaše u logoru, Prohići su 1943. godine usvojili, odnosno prihvatili kao svoje dijete i, nakon izvjesnog vremena, da ne bi bila otkrivena od ustaških agenata, prebacili iz Gračanice u Zagreb, i sakrili kod Avdinog brata Sabrije. Tako je mala Nada živa i zdrava dočekala kraj rata...

“Ovo je rijedak slučaj da je neko ko je spašen za vrijeme holokausta još uvijek živ i zato nam je posebna čast što je danas među nama Nada, ali i potomci njenih spasioca. Sigurno je da je ovo još jedan dokaz da se u BiH

odavno živjelo zajedno, da nismo gledali ko je koje nacionalnosti i vjeroispovijesti, nego kako i kome pomoći”, rekao je, pored ostalog, Jakob Finci, predsjednik Jevrejske zajednice u BiH i domaćin manifestacije na kojoj je nerezidentni ambasador Izraela u BiH Boaz Rodkin u ime “Jad vašema” predao medalju Pravednika porodici Prohić. Priznanje je u ime porodice preuzeo Rejhan Prohić, unuk Sabrije Prohića, koji je nekoliko godina aktivno radio na dokumentovanju i prikupljanju dokaza da je malu Nadu spasila njegova porodica. Inače, komisija koja o tome odlučuje vrlo je rigorozna. U postupku dokazivanja komisijom uvijek predsjedava jedan od sudija Vrhovnog suda Izraela. Teško je dobiti takvo priznanje ako stvarno ne postoje svi dokazi da se stvarno i učinilo takvo herojsko djelo. Upravo zato, ova priznanja imaju svoj poseban značaj i težinu. Gračanica može biti ponosna što ima “svoje” pravednike iz porodice Prohić.

30. 5. 2018.

Održana 19. sjednica Općinskog vijeća Gračanica: Odluka o općinskim priznanjima i imenovanje članova nadzornih odbora javnih preduzeća “Vodovod i kanalizacija” i “Komus”

Pored navedene dvije tačke, koje su, svakako, izazvale i najveći interes vijećnika, na dnevnom redu našlo se još 14 tačaka, od kojih je većina rutinski “odrađena”. Tako je naprimjer druga tačka dnevnog reda, *Odluka o izmjenama i dopunama Poslovnika o radu Općinskog vijeća* na prijedlog nadležne Komisije povučena a dodane su i dvije nove tačke i to *Rješenje o razrješenju člana stalnog radnog tijela OV Gračanica, Komisija za poljoprivredu* te *Rješenje o imenovanju člana stalnog radnog tijela OV Gračanica, Komisija za poljoprivredu*. Između ostalog, usvojene su tri Odluke o prodaji, zamjeni i kupovini nekretnina i zemljišta, kojim se pokreće postupak kupovine placeva za gradnju četiri kuće

porodicama čije su kuće uništene u poplavama, prije dvije godine. Imenovanje članova nadzornih odbora javnih komunalnih preduzeća “Vodovod i kanalizacija” i “Komus” Mirsad Čamdžić (Naša stranka) okarakterisao je kao rezultat “političkog dila” SDP i SDA (kao neformalne koalicije u Vijeću), ali je većina prihvatila ponuđeni prijedlog. Pravilnikom o uslovima za obavljanje poslova upravitelja zgrada kolektivnog stanovanja se planira uvesti red u stanje zajedničkog stanovanja. U izvještajnom dijelu sjednice razmatrani su Izvještaji o radu u prošloj godini javnog preduzeća “Komus”, Općinskog pravobranilaštva i Općinskih inspekcija, te je data visoka ocjena o njihovom radu, te Izvještaj o provedenim podsticajnim mjerama i njihovim efektima u poljoprivredi u 2017. godini na području općine Gračanica Vrijedi spomenuti i dvije usvojene informacije: o odlaganju komunalnog otpada iz domaćinstava i privrednih subjekata i informaciju o zbrinjavanju napuštenih i izgubljenih životinja (pasa lualica) na području općine gračanica.

31. 5. 2018.

“Gikil” Lukavac – opet truje Spreču

Prema informaciji iz Sportskog ribolovnog saveza Federacije Bosne i Hercegovine, iz Global ispat koksne industrije Lukavac (GIKIL) opet je došlo do ispuštanja većih količina otpadne materije u rijeku Spreču, za koju se prema prvim informacijama smatra da je toksična. Na mjestu curenja tekućine nepoznatog sastava uviđaj su obavili nadležni federalni inspektor, pripadnici Ministarstva unutrašnjih poslova Tuzlanskog kantona i tužilac Kantonalnog tužilaštva u Tuzli. Sastav tekućine koja je ispuštena u rijeku bit će poznat nakon što budu obavljene sve neophodne analize. Nakon incidenta, u saopćenju za javnost u GIKIL-u su priznali da je u fabrici Koksara u jutarnjim satima došlo do tehničkog kvara, tačnije do propuštanja razdvajaa sirovog katrana, prilikom čega je iscurila i manja količina nadkatranske vode.



Prema riječima Suada Imamovića, izvršnog direktora za zajedničke usluge u GIKIL-u, saniranju kvara se pristupilo odmah po saznanju, te je kompletan problem riješen za vrijeme rada prve smjene i neće imati veće posljedice po okoliš. (Tuzlanski.ba)

1. 6. 2018.

Gračanica: smanjenje nezaposlenih na Birou

U mjesecu maju tekuće godine evidentirana su 7473 nezaposlena lica, od čega je 4435 je žena i 3038 muškaraca. To je manje za 108 u odnosu na prethodni mjesec, a čak za 1704 u odnosu na isti mjesec 2013. Na spisku nezaposlenih je 3007 KV i 2254 nekvalifikovanih. Prvi puta je zaposlenje tražilo 2283 lica, korisnika novčane naknade bilo je 170, a zdravstvene zaštite 4028. (Radio Gračanica)

2. 6. 2018.

Dan općine–svečana akademija i dodjela općinskih priznanja

Nakon polaganja cvijeća na spomen-obilježja u gradu, kao što je uobičajeno, održana je svečana akademija, kojoj su, pored članova Općinskog vijeća, prisustvovali i brojni gosti, istaknuti privrednici, kulturni i javni radnici. Svečani referat, pročitao je načelnik općine Nusret Helić i iznio postignuća općine u prošloj i ovoj godini, posebno apostrofirajući dinamičan razvoj privrede, naglasivši da se u Gračanici trenutno gradi 15 novih kompanija, čime se otvaraju nova radna mjesta, raste broj zaposlenih u realnom sektoru i td.

Ovogodišnja općinska priznanja dobili su: *Zlatne plakete*: DOO "Poli" Gračanica i JP «Komus» Gračanica, *Zlatne značke*: humanitarka Azra Sakić, nogometaš "Rozerhajma" Besim Šerbečić i Osman Adžemović, koji je iz požara spasio 12-godišnjeg Mehmeda Šabiša. Ambasadoru Češke u BiH Jakobu Skalniku priznanje *Počasni građanin Gračanice*, bit će uručeno naknadno. Na bini su se pojavili i najbolji učenici osnovne i srednjih škola, koji su osvajali priznanja na kantonalnim i federalnim takmičenjima iz raznih disciplina i predmeta, te najbolji sportisti Gračanice. Potom je izveden bogat kulturno-umjetnički program. Svečanostima i obilježavanju Dana općine prisustvovala su i brojne visoke zvanice, između ostalih delegacija bratske opštine Pljevlja iz Crne Gore na čelu sa predsjednikom opštine Mirkom Dačićem, ambasador Crne Gore Milan Lakić i ambasador Francuske Guillaume Rousson.

2. 6. 2018.

Dan općine – svečano otvorena nova fabrika obuće "SLT Enterprise" u Gračanici, vlasnik Nino Šabić

To je firma koja je prošle godine započela rad sa dosta skromnim kapacitetom, u dosta skućenom prostoru, sa dvadesetak radnika. Obezbijedivši prodaju svoje proizvodnje u inostranstvu, firma se brzo razvijala, tako da je otvaranje novog pogona od oko 700 kvadratnih metara na Lukama (blizu raskrsnice kod "Feringa") dočekala sa više od stotinu zaposlenih. Kako je rečeno na otvaranju, firma je obezbijedila tržište u više evropskih zemalja i planira do kraja godine zaposliti još pedesetak novih.

4. 6. 2018.

Iako je industrija namještaja jedna od najbrže rastućih grana u Bosni i Hercegovini, proizvođači i dalje teško dolaze do sirovina

Finalni prerađivači drveta samo na Tuzlanskom kantonu izvezu namještaja u ukupnoj

vrijednosti od oko 60 miliona KM godišnje i to uglavnom u Njemačku, Italiju, Austriju i druge evropske zemlje, kao i zemlje iz okruženja poput Srbije i Hrvatske. Manji dio sirovina nabavljaju u BiH, a ostatak su prinuđeni uvoziti. Iako drvna industrija na Tuzlanskom kantonu ostvaruje rekordan izvoz, drvoprerađivači poručuju da bi mogli ostvariti i će rezultate kada bi imali bolje uslove za to. Navodimo poruke iz dvije gračaničke drvoprerađivačke firme: "Osnovni problem je nedostatak Zakona o šumama TK. Problem je i raspodjela sirovine. Drveta ima sasvim dovoljno, ali on se izvozi u poluproizvodima u dasci, elementima itd, ne favorizuju se finalni proizvođači i to je ključni problem razvoja drvne industrije u BiH", rekao je Ramiz Grapkić, direktor gračaničke "Jadrine" i predsjednik Grupacije drvoprerađivača KPK Tuzla. Sličnog je mišljenja i Sejfudin Kamarčić, komercijalni direktor "ISOWOOD" iz Gračanice: "Mi treba da uvozimo sirovinu iz najjače evropske zemlje Njemačke – dasku kao sirovinu i od nje pravimo finalni proizvod i izvozimo ga u EU gdje zarađujemo profit. Finalni proizvođači moraju stavljati u funkciju brentu, kao da smo primarni proizvođač drveta da bi mogli da sudjelujemo na licitacijama". Inače, pokrivenost Bosne i Hercegovine šumom je oko 53%, tako da bi drvna industrija mogla biti okosnica razvoja privrede. Ovaj potencijal za sada nije dovoljno iskorišten. Drvoprerađivači čekaju donošenje Zakona o šumama FBiH više od devet godina. (RTVTK / Miruhbosne)

7. 6. 2018.

Novost upisne politike u srednje škole: prvo IT odjeljenje gračaničkoj gimnaziji

Informatika, kompjuteri odavno su postali itekako sastavni dio našeg života, pa je potreba za kadrom u ovoj oblasti sve veća. Nihad Hodžić, direktor firme "Tring" koja upošljava 40 radnika i koja je nedavno proizvela prvi BH mikro računar, za Radio Gračanicu

tim povodom za Radio Gračanicu izjavio je sljedeće: “Nedavno sam bio na jednoj konferenciji u Sarajevu. U ovom trenutku u BiH nedostaje 6000 radnika iz IT sektora. Slažem se sa vama, prava je stvar formiranje odjeljenja u gimnaziji mada mislim da se to trebalo uraditi i ranije. Ovo je sektor budućnosti a osnovna znanja stečena u srednjoj školi su sasvim dovoljna za dobar posao i dobru platu čak i bez fakulteta.” (Izvor Radio Gračanica)

8.–10. 6. 2018.

Jedanaesti po redu moto-susreti u Gračanici...

...ove godine okupili su više stotina bajkera iz 120 moto-klubova regiona (Bosna i Hercegovina, Hrvatska, Srbija, Slovenija), te iz Austrije i Švicarske. Učesnici manifestacije okupljaju se u posebnom kampu na izletištu Vis, osam kilometara od Gračanice u okviru kojeg je instalirana kuhinja (za bajkerski grah), postavljeni su šatori za smještaj, na raspolaganju su im sportski tereni. Tokom večeri zabavljala su ih četiri domaća benda. Kako izvještava dopisnik “Avaza” Hasan Čalić, “tu su i bajkerska takmičenja, a najatraktivnije je – spora vožnja motocikla.” Ovoga puta, iz tehničkih razloga nije bilo defilea. Organizator i domaćin manifestacije je i ovoga puta Moto klub “Lutalice” uz Gračanicu, čiji je predsjednik Rasim Zahirović Raski. (Izvor <https://avaz.ba>).

11. 6. 2018.

Promocija 45. broja “Gračaničkog glasnika” – protekla u znaku teme: “Patriotska liga na području Gračanice i sjeveroistočne Bosne”.

Otvarajući skup glavni i dogovorni urednik Časopisa, prof. dr. Omer Hamzić, je poželio dobrodošlicu i pozdravio sve prisutne, u prvom redu ugledne goste iz Tuzle: univerzitetskog prof. Dr. Saliha Kulenovića i publicistu-istraživača inž. Dževada Tosumbegovića, istaknute osnivače i organizatore Patriotske lige za Tuzlansku regiju, čija su imena i na-

javljena uz temu promocije. Skupu su prisustvovali i istaknuti ratni komandanti Armije BiH: major Ibrahim Nurikić, načelnik Operativne grupe 2 Gračanica A BiH, zatim Smail Mešić, pukovnik OS BiH, ratni komandant 111 gračaničke i Mirsad Sinanović ratni komandant dobojske 109 brigade, autor monografije o toj brigadi, a čiji je prikaz napisao pukovnik Mešić i tako na najbolji način ušao u krug saradnika “Gračaničkog glasnika”. U nastavku promocije, prije nego što je uzeo riječ, prof. Kulenović je predstavljen i kao naučni djelatnik, koji je kroz svoj rad bio višestruko vezan za Gračanicu. Godinama se aktivno bavio proučavanjem kulturne prošlosti Gračanice. Između ostalog, svoju doktorsku disertaciju iz oblasti etnologije uradio je upravo na osnovu terenskih istraživanja na području općine Gračanica. Rezultat tih istraživanja je izuzetno važna knjiga za Gračanicu pod naslovom “Antropogeografske i etnološke karakteristike općine Gračanica”, te najmanje još desetak vrlo vrijednih radova iz oblasti etnologije sa ovog našeg područja, od kojih smo neke objavili i ovom našem časopisu. Kao već dobar poznavalac prošlosti Gračanice, prihvatio je zamolbu Redakcije da bude prvi glavni urednik, naravno i saradnik Časopisa “Gračanički glasnik”. Kulenović je potom govorio o svojim istraživanjima u Gračanici i čestitao Redakciji “Gračaničkog glasnika” na upornosti i do sada postignutim rezultatima. Potom je temu promocije “Patriotska liga na području Gračanice i sjeveroistočne Bosne” ukratko elaborirao Dževad Tosumbegović. Moderator promocije bila mr. sc. Fatima Bećirević:

20. 6. 2018.

“Terme Ozren” – s lijeve strane Spreče, u području Kakmuža na domak Gračanice: početak velike investicije na bazi korištenja termomineralne vode

Na toj lokaciji, nedaleko od sprečanskog mosta koji spaja Gračanicu sa željezničkom

stanicom Sočkovac, kojih stotinjak metara, na putu prema Kakmužu (danas u RS), još davne 1984. godine je čuveni akademik i stručnjak za vode svjetskog glasa Josip Bać, zamoljen da pronađe pitku vodu za Gračanicu, otkrio umjesto pitke, izdašna izvorišta termomineralne vode. Nakon toga, u općini Gračanica (područje je pripadalo predratnoj općini Gračanica) ubrzano se krenulo u planiranje korištenja tog prirodnog bogatstva i to u nekoliko pravaca: prvo je” rezervisano zemljište” za izgradnju velikog medicinsko-rekreativnog centra, čiji bi se sadržaji razvijali s obje strane Spreče (sa pristupnim saobraćajnicama, bazenima, hotelskim kapacitetima, igralištima, uređenim kamping prostorima itd). Pored medicinsko-rekreativnih sadržaja, korištenje termomineralne vode planirano je i za razvoj poljoprivrede (zagrijavanje plastenika i uzgoj posebnih vrsta ribe), izdvajanje plina CO₂ i konačno, za toplifikaciju Gračanice. Bili su to generacijski, ali realni projekti, zasnovani na postojećim prirodnim resursima. Za njihovu realizaciju na dugoročnoj osnovi, osnovana je i posebna Radna organizacija pod nazivom “Terme Ozren”. Uprkos poznatim teškoćama i problemima u zemlji, do početka ratnih sukoba, 1992. godine, izgrađen je bazen za kupanje sa pomoćnim objektima, koji se koristio u ljetnim mjesecima, a počela je i eksploatacija plina CO₂. Tokom rata došlo je do devastacije tih objekata.

Nekoliko godina poslije rata, na desnoj (gračaničkoj) strani Spreče (područje Šenika), aktivirane su nove bušotine termomineralne vode, dodijeljena koncesija novim investitorima, koji su izgradili dva bazena za kupanje i prateće objekte, prije svega za stanovništvo Gračanice i okoline. Stavljajući bazene u upotrebu, počeli su eksploatirati i plin CO₂ za plinaru u Kakmužu, koja je u međuvremenu ponovo aktivirana.

I na staroj lokaciji u Kakmužu bilo je više pokušaja da se, osim plinare, aktiviraju i ostali, prije rata izgrađeni bazeni za kupa-

nje, ali bezuspješno... Napokon, kako piše “Dnevni avaz”, ove godine pojavio se pravi investitor, koji je ponudio svoj plan revitalizacije i budućeg korištenja tih resursa. To je poduzetnik Dragiša Milojević iz Bijeljine, koji svoje iskustvo u korištenju termomineralnih voda, stečeno u Švicarskoj, na ovaj način pokušava prenijeti i u Bosnu i Hercegovinu. Po dobijanju koncesije od vlade RS, obezbijedio je projektnu dokumentaciju i na toj lokaciji počeo gradnju Rekreaciono-ugostiteljskog centra, koje je ponio nekadašnji naziv “Terme Ozren”. “Bit će to veliki kompleks, odnosno vodeni park s tri otvorena i šest zatvorenih bazena s termomineralnom vodom, temperature 37 stepeni. U sklopu kompleksa bit će sagrađen i hotel sa 165 soba i sedam apartmana i welnes centrom. Ovdje će turistička sezona trajati 365 dana u godini. Tu će biti i sportski tereni, također otvoreni i zatvoreni.. U kompleksu će biti otvoreni i restoran, savremeni medicinski centar, sala sa 700 mjesta, pogodna za svadbe, sastanke, kongrese” – kazao je za “Avaz” direktor budućeg Centra Slaviša Jović. Ukupna vrijednost investicije je oko 5 miliona KM. Građevinske radove, koji su uveliko počeli, izvode bh. firme iz Bijeljine, Živinica, Gračanice, Dervente... Do maja naredne godine trebalo bi da se završi prva faza, sa izgrađenim bazenima. Uz ove, radi se i na novoj istražnoj bušotini termomineralnih voda, koje su osnov cijelog projekta. Možda je ovo početak ostvarenja vizije prof. Baća, s početka ovog teksta.

21. 6. 2018.

Dvadeseta sjednica Općinskog vijeća Gračanica: usvojen Nacrt odluke o izmjenama i dopunama statuta Općine...

...čime je ponovo otvoreno pitanje funkcije predsjedavajućeg Općinskog vijeća. Jedni su se zalagali za deprofesionalizaciju, a drugi brojniji za profesionalno obavljanje te funkcije s obzirom na važnost tih poslova. Javna rasprava o tome će trajati tri mjeseca – valjda

zbog važnosti. Osim toga, nakon tromjesečne rasprave, usvojene su izmjene i dopune Poslovnika o radu Općinskog vijeća, čime su se pokušale otkloniti brojne nepreciznosti i ograničenja o radu Vijeća, kako je izjavio njegov predsjedavajući Nihad Krajinović za Kantonalnu TV. Usvojena je i odluka o osposobljavanju nezaposlenih osoba visoke stručne spreme u organima uprave, javnim ustanovama i preduzećima i pravnim subjektima privatnog i javnog sektora, čime je otvorena mogućnost da svršeni fakultetlije odrade pripravnički staž, usvojena je i odluka o broju i visini stipendija učenicima srednjih škola i studentima za školsku 2018/19 školsku godinu, podržan plan sanacije građevinskog zemljišta. Imenovan je novi upravni odbor Doma zdravlja Gračanica. Na dnevnom redu se našla i informacija o stanju putne infrastrukture na području općine i odluka o projektima javno-privatnog partnerstva.

12. 7. 2018.

U Lukavici otvoren memorijalni Spomen-park "Ne zaboravi Srebrenicu"

U okviru spomen parka, u prikladno uređenom ambijentu sa klupama, postavljena je spomen- ploča u obliku srebreničkog cvijeta, koja će trajno podsjećati na karakter odbrambeno-oslobodilačkog rata i na žrtvu koju su podnijeli svi stanovnici BiH, posebno stanovnici Srebreničke enklave. Iako je naselje sa srazmjerno najvećim brojem žrtava na području općine Gračanica, Lukavica je bila utočište mnogim prognanicima sa tih područja, te ima poseban senzibilitet prema srebreničkim žrtvama, koji iskazuje i kroz ovaj projekat. Nosilac projekta bila je Udruga "Nova inicijativa", koja je putem javnog poziva obezbijedila i potrebna sredstva iz Budžeta općine

19. 7. 2018.

"Širbegović" završava radove na montaži "Delta Planeta" na površini

od cca 62.500m² prostora u Banja Luci

Lokacija objekta i propisani standardi u vezi sa seizmikom (objekat je smješten u IX seizmičkoj zoni) zahtijevali su nestandardnu primjenu konstrukcije. Zahvaljujući dugogodišnjem iskustvu, inženjerski tim firme primijenio je rješenja i osigurao sistem koji je prepoznat na sličnim projektima u regionu. "Ponosni smo što radimo sa najrenomiranim firmama u regiji na izuzetno značajnim i zahtjevnim projektima gdje zajedno sa ostalim učesnicima postavljamo nove standarde u građevinarstvu. Kvalitet naših proizvoda i zadovoljstvo kupca ostaje naše stalno opredjeljenje kao najbolja garancija za uspješno poslovanje", poručuju iz Kompanije "Širbegović" (Izvor: Akta.ba)

20. 7. 2018

Asfaltirane dionice lokalnih puteva u Lukavici (Delići) i mahali Javor u Gračanici

I jedna i druga dionica su dužine od po 350 metara. Osim općine, u Lukavici su za asfalt svoje učešće obezbijedili i mještani. U naselju Javor je, osim asfalta, urađena i oborinska kanalizacija, a vrijednost ovog projekta je cc 80.000 KM. Za ovu dionicu je planiran i nastavak radova prema Babićima, za što je već pokrenuta procedura. Izvođač radova za oba projekta je bio Roading.

3. 8. 2018.

Renomirani proizvođač liftova iz Miričine (Gračanica) gradi novi, moderno opremljeni kosi lift u naselju Ciglane u Sarajevu

U ime Općine Centar kao investitora projekta, Ugovor je potpisao načelnik dr. Nedžad Ajnadžić, a u ime Euro Prosta direktorica firme Refija Begović, koja je, nakon potpisivanja ugovora za medije izjavila: "Ovo je, zasigurno, veliki projekat sa našu firmu, gdje ćemo od samog projektovanja, pa do proizvodnje i montaže lifta obratiti pažnju

na svaki detalj kako bi nakon puštanja u rad korisnici kosog lifta imali maksimalnu sigurnost i udobnost tokom putovanja.” (Izvor: Klix)

3. 8. 2018.

Usljed eksplozije u “Gikilu” onečišćena tekućina iscurila u korito rijeke Spreče

Kako je zvanično saopšteno, do incidentnog ispuštanja onečišćene tekućine došlo je usljed eksplozije rezervoara R 34 (RJ Kondenzacija), u kome se nalazila amonijačna voda. U toku incidenta isteklo je blizu 200-300 kubnih metara amonijačne vode sa primjesama katrana, a pretpostavlja se da je oko 70 metara kubnih isteklo u rijeku Spreču. Odmah po saznanju, kako je službeno saopšteno, na mjesto događaja su izašli inspektori Federalne uprave za inspeksijske poslove iz Sarajeva i tužioci Kantonalnog tužiteljstva Tuzlanskog kantona. O ispuštanju onečišćene tekućine u rijeku Spreču obaviješteni su predstavnici Agencije za vodno područje sliva rijeke Save, policajci nadležne Policijske Uprave, Inspektorat Republičke uprave za inspeksijske poslove Republike Srpske, Kantonalni inspeksijski organi, Federalno Ministarstvo prostornog uređenja i zaštite okoliša i Federalno ministarstvo poljoprivrede, vodoprivrede i šumarstva. Federalni vodni inspektor je proglasio II stepen ugroženosti i angažovao ovlaštenu pravnu subjekt “Delta petrol” Kakanj za sprečavanje daljnjeg širenja onečišćenja koje pluta rijekom Sprečom. “Ovim putem obavještavamo javnost koja koristi vodu iz rijeke Spreče za zalijevanje poljoprivrednih površina nizvodno od Lukavca kao i bunare koji se nalaze u blizini rijeke da ih ne koriste dok se ne utvrdi stepen zagađenja voda”, saopćio je vodni inspektor. Uzorke rijeke Spreče će u toku noći uzeti predstavnici laboratorije Agencije za vodno područje sliva rijeke Save iz Sarajeva.

7. 8. 2018.

Svečan obilježen 7. avgust, Dan pobjede na Visu

Obilježavanje je počelo 4. 8. 2018. sportskim takmičenjima, među ostalim i nogometnim turnirom, druženjem boraca i narodnim veseljem, a nastavljeno na sam dan, 7. 8. Izviđačkim pohodom od Malešića do samog platoa Visa, te prigodnim obraćanjima kod samog spomenika, te kulturno-umjetničkim i vjerskim programom.

14. 8. 2018.

Umrla gračanička pjesnikinja Atifa Dolinar Terzić

Najveći dio životnog i skoro čitav svoj radni vijek provela je u Sarajevu, najviše na radu u administraciji Republičke skupštine. Definitivno se vratila u Gračanicu poslije rata, gdje je ostatak života provela kao penzioner. Voljela je stare bosanske pjesme i bavila se pisanjem poezije, najviše za svoju “dušu”. Ponekad je sa svojim stihovima nastupa na lokalnim kulturnim manifestacijama, a nekoliko svojih pjesama objavila je i u “Gračaničkom glasniku”. U njenim pjesmama dominiraju patriotski i religiozni motivi. Najpoznatija joj je zbirka pjesama “Tegbirima kosmos odjekuje” (Gračanica, 1996.). Umrkla je u 86. godini života, ukopana na mjesnom greblju “Režići”.

16. 8. 2018.

“Ljetna kulturna tura”–nešto novo u “kulturnoj ponudi BKC” u Gračanici

Zamisao je bila da se organizuje besplatni autobus kojim bi svi zainteresovani krenuli ispred Centralnog spomen obilježja Odborbeno-oslobodilačkog rata 92-95 i zgrade Općine do mjesne zajednice Sokola gdje bi se posjetila obnovljena Stara džamija koja ima status nacionalnog spomenika BiH. Iako se organizator pribojavao da neće biti dovoljnog odziva, autobus je bio pun znatiželjnika iz Gračanice. U pratnji “ekspedicije” bila je i ekipa RTV TK. Kako je izvijestio

novinar Radio Gračanice, nakon desetominutne vožnje stiglo se podno ostataka Starog grada Sokola i ljeptice koja je nakon obnove zablislala punim sjajem, Stare džamije u Sokolu. Po planu, u Sokolu su domaćini bile članice Udruženja žena "Gradina" koje se i brinu o obnovljenoj džamiji. U prelijepom ambijentu, unutar džamije, posjetioce je dočekala izložba umjetničkih fotografija koju su nedavno postavili foto klub Gračanica i Asocijacija umjetničke fotografije BiH. O izloženim fotografijama osnovne informacije je dao predsjednik foto kluba Gračanica Hasan Pušakr. Direktor BKC Gračanica Nedžad Peljto, i sam iznenadjen kvalitetom vlastite ideje, javno je rekao da je ovo početak valorizacije turističkih i kulturnih potencijala na ovakav način. Zapravo i jeste. Ovo je početak jedne nove priče o Sokolu, o obnovljenoj Staroj džamiji i budućem obnavljanju Starog grada u Sokolu. O staroj džamiji je prisutne upoznao magistar Edin Šaković, koji je, uz prof. dr. Omera Hamzića, i mr. sc. Rusmira Djedovića, najviše i uradio na proučavanju, zaštiti i afirmaciji ukupne kulturno-historijske baštine Gračanice i šire okoline. Dugo se čekalo, da bi ova "historijska priča" izašla "uživo" sa stranica "Gračaničkog glasnika" i konačno počela da se razvija u najboljem mogućem smjeru. Moramo vjerovati da će uskoro iz Sokola početi dolaziti jednako lijepe vijesti vezane za obnovu Starog grada. Mogla bi ovo u dohledno vrijeme postati jedna od najatraktivnijih turističkih destinacija šire regije koja bi umnogome pozitivno promijenila puno stvari u samom Sokolu (odlomci iz reportaže objavljene na Radio Gračanici).

21. 8. 2018.

Umro Galib Ahmetašević – pomoćnik komandanta za moral Operativne grupe 2 Armije Bosne i Hercegovine...

U burnim danima pred agresiju na BiH našao se na odgovornoj dužnosti sekretara

Sekretarijata za narodnu odbranu i po toj funkciji učestvovao kao član u radu Savjeta za narodnu odbranu općine Gračanica uoči i na početku samog rata kada je trebalo donositi teške odluke od presudnog značaja za organizaciju odbrane na ovom području. Prije rata učestvovao je u političkom životu Gračanice prije rata 1992. godine, bio aktivan u strukturama Socijalističkog saveza, a u jednom mandatu obavljao je i dužnost sekretara Opštinskog komiteta Saveza komunista. Upamćen je kao čovjek blage naravi, omiljen u društvu... Volio je zapjevati poneku staru sevdalinku, za svoju dušu i za svoje društvo. Zato su ga u krugu prijatelja i zvali "naš gale". Posljednje godine života proveo je tiho i povučeno u krugu svoje porodice. Preselio je u 76. godini života i ukopan na greblju "Režići", 22. 8. 2018. godine..

1.8. 2018.

Gračanički "Variplast" obilježava 35 godina postojanja i uspješnog rada: novi pogon i savremeni strojevi – ulaganje od 5 miliona KM

Time ova gračanička firma, kao lider u oblasti proizvodnje i prerade plastičnih masa u BiH, zaokružuje investicioni ciklus. "U novom pogonu, površine 3.000 kvadratnih metara, instalirat ćemo najsavremeniju opremu, ekstruder te mašine za reciklažu plastike koja nastaje u procesu proizvodnje i onu koja se otkupi. U gradnju pogona i strojeve "Variplast" će investirati 5 miliona maraka. Posao će dobiti deset novih radnika i sa sadašnjih 92 prelazimo cifru od stotinu radnika", izjavio je za "Dnevni avaz" vlasnik i direktor firme Mujo Hasić. Firma proizvodi za potrebe prehrambene industrije, za građevinarstvo, tekstilnu, hemijsku industriju i široku potrošnju i izvozi u Švedsku, Holandiju, Dansku, Srbiju, Hrvatsku.

22. 8. 2018.

Divlja deponija smeća općine Petrovo na lijevoj obali Spreče, kod

samog mosta između Petrova i Donje Orahovice odavno je najveći ekološki problem za Orahovičane, ali i ostale, koji žive nizvodno do te lokacije

Tim povodom održana je posebna sjednica Vijeća mjesne zajednice Donja Orahovica, sa koje je upućen apel nadležnim da hitno poduzmu odgovarajuće mjere: “Kada se ta deponija zapali, a neko je zapali najmanje jednom sedmično, u Orahovici postaje nemoguće živjeti. Ko zna šta se tu sve ne odlaže i spaljuje. Imamo informacije da se tu odlaže i spaljuje medicinski i farmaceutski otpad. Bez obzira na nadležnosti, granice općina i entiteta, niko nema prava da nas truje.”, poručili su mještani Donje Orahovice, pozivajući i mještane općine Petrovo i drugih mjesnih zajednica da im se pridruže u borbi za uklanjanje te divlje deponije, koja jednako truje ljude i sa jedne i sa druge strane Spreče, naročito one nizvodno – jer svaka mala poplava prvo zahvati tu divlju deponiju. Ukoliko se ništa ne poduzme na saniranju ovog ekološkog problema, mještani Orahovice najavili su i radikalnije mjere – proteste i blokade puteva. (Radio Gračanica)

22. 8. 2018.

Federalni inspektor donio rješenje o zabrani rada kompanije “Gikil” Lukavac

“Imajući u vidu da je privrednom društvu *Gikil* d.o.o. Lukavac, konkretno za pogone za proizvodnju koksa, hemijskih proizvoda i energije u općini Lukavac, zaključkom Federalnog ministarstva okoliša i turizma od 7. augusta 2018. godine odbačen zahtjev za izdavanje okolinske dozvole, te da kontrolisani subjekt ne primjenjuje zakonske odredbe u obavljanju privredne djelatnosti, Federalna uprava za inspeksijske poslove, odnosno, federalni inspektor zaštite okoliša je 22. augusta donio rješenje o obustavi rada ovog privrednog subjekta”, navodi se u saopćenju Federalne uprave za inspeksijske poslove i dodaje da je jedan od najnedisciplinovanijih

jih privrednih subjekata u Federaciji Bosne i Hercegovine (Klix.ba)

25. 8. 2018.

Država prvi puta “pokazuje zube” povodom trovanja rijeke Spreče

Radi se o hapšenju generalnog direktora Global Ispat Koksne Industrije Lukavac (GI-KIL) Debasish Ganguly, 23. 8. 2018. godine, kojem se na teret stavlja krivično djelo onečišćenje okoliša. Iako je imenovani nakon kriminalističke obrade u MUP-u TK pušten, na slobodu, uz izrečene “mjere zabrane”, ovo hapšenje je imalo pozitivnog odjeka u domaćoj javnosti, a posebno u naseljima na obje strane Spreče, nizvodno od Lukavca, zato što država po prvi puta poduzima nešto konkretno da spriječi permanentno trovanje Spreče.. Budući da je problem izuzetno složen, bolji poznavaoци prilika poručuju da ne treba gajiti neki pretjerani optimizam. Već se, s druge strane najavljuju protesti radnika (u GIKIL-u ih ima oko 1000), koji odlučno odbacuju i svaku pomisao o zatvaranju tog hemijskog giganta, čiji je većinski vlasnik Vlada TK. (Izvor: Klix)

25. 8. 2018.

Soko kod Gračanice: otkriveno spomen-obilježje poginulim borcima – šehidima i civilnim žrtvama rata

Otkrivanju spomen-obilježja, podignutom u znak sjećanja na poginule borce i civilne žrtve tokom odbrambeno-oslobodilačkog rata iz ovog sela prisustvovali su brojni mještani, roditelji i rodbina poginulih, te ugledni gosti iz općine Gračanica. Sredstva za podizanje spomenika su obezbijedili: Ministarstvo za boračka pitanja Tuzlanskog kantona, općina Gračanica i nekoliko privrednika. Spomenik se nalazi na vrlo lijepoj lokaciji, takoreći na samom prilazu urbanom jezgru starog grada Sokola, u kojem dominiraju dva nacionalna spomenika: srednjovjekovna utvrda i obnovljena stara džamija “Fethija”, jedna od najstarijih u ovom kraju. Nakon prigodnih obraća-

nja nekoliko zvaničnika, spomen-obilježje je otkrio dugogodišnji imam mjesnog džemata Muhamed ef. Dizdarević, sa djecom poginulih boraca: Mirzetom Fišić i Hasijom Hadžić. Potom je izveden prigodan vjerski i kulturno-umjetnički program.

29. 8. 2018.

Popravka i asfaltiranje lokalnih puteva u Piskavici kod Gračanice

Rekonstruisana su i asfaltirane dvije kraće dionice u ukupnoj dužini od 370 metara: prva u mahali Hamidovići, dužine 190, a druga u mahali Hrvici 180 metara. Finansijska sredstva obezbijedila je općina iz tekućeg Budžeta, a u toku izvođenja radova i sami mještani za asfaltiranje dodatnih površina (proširenja, ulazi u avlije itd.).

30. 8. 2018.

Održana 21. sjednica Općinskog vijeća: podbačaj u izvršenju Budžeta za prvih 6 mjeseci za 16%, zabrinutost zbog novog trovanja Spreče...

Za prvi 6 mjeseci ove godine ostvareno je 5.245.000 ili 16% manje u odnosu na plan (13.397.935 KM) i njegovo izvršenje u istom periodu prethodne godine. Prije usvajanja, bilo je i nekih zamjerki, između ostalog i zato što nije iskazana struktura budžetskih izdvajanja za sport, drugi zato što se kasnilo u realizaciji transfera prema mjesnim zajednicama, porodiljama, političkim strankama i generalno, zato što nije realizovano više planiranih infrastrukturnih projekata. Iz Budžetske rezerve, od planiranih 130.000 KM, utrošeno je 16.421 KM. Od važnijih tačaka, na ovoj sjednici, usvojena je Odluka o utvrđivanju javnog interesa za rekonstrukciju regionalne ceste Srebrenik – Sladna-Bukva (dionica Pandurište) i Odluka o prodaji općinskih nekretnina, između ostalog i za finansiranje rekonstrukcije Nogometnog stadiona "Luke" u Gračanici. Vijećnici su dopunili Etički kodeks, kako bi se, valjda

prostojnije ponašali na sjednicama. Ponuđeni Nacrt prostornog plana TK ocijenili su kao neprihvatljiv za Gračanicu zato što je u njemu izostavljena brza cesta Tuzla–Doboj, regionalna deponija, trafo stanica Gračanica 2. Izvještaj o ostvarenju godišnjeg plana implementacije strategije razvoja općine Gračanica za 2017.godinu prošao je uglavnom bez rasprave, kao i pretposljednja, valjda najvažnija, Informacija o aktuelnim privrednim kretanjima na općini Gračanica u 2017. Po red redovnih tačaka dnevnog reda, vijećnike je predstavnik Ekološko-ribolovnog društva "Drijenča" Gračanica informisao o katastrofalnim posljedicama trovanja Spreče iz lukavačkog GIKIL-a u zadnjih mjesec dana. Izražena zabrinutost vijećnika, u tom pogledu, nažalost, neće ništa promijeniti.

31. 8. 2018

U naselju Buk otkriveno spomen-obilježje šehidima i civilnim žrtvama rata

Skromna svečanost organizovana je u okviru programa obilježavanja Dana 111./221. gračaničke brigade. Osim mještana ovog malog naselja, inače najudaljenijeg od centra općine, svečanosti su prisustvovali predstavnici boračkih organizacija, lokalne vlasti, te boračko izaslanstvo TK Spomen-obilježje otkrili su predsjednik Mjesne zajednice Buk Hajrudin Hevešević, načelnik općine Nusret Helić i ministar za boračka pitanja TK Enes Gegić. Potom su brojne delegacije, između ostalih mjesne zajednice Buk, boračkih organizacija, Općine, udruženja građana, položile cvijeće na spomen-obilježje a predstavnici MZ Buk su svima koji su pomogli izgradnju spomen-obilježja uručili zahvalnice (izvor: pres Općine Gračanica)

1. 9. 2018.

Obilježavanje Dana 111./221. gračaničke brigade...

...počelo je na Centralnom spomen obilježju polaganjem cvijeća, odavanjem počasti i pri-

godnim časom historije na kojem je, nakon pozdravnog obraćanja općinskog načelnika Nusreta Helića, govorio jedan od ratnih komandanata brigade pukovnik Smajil Mešić. Iz njegovog obraćanja, posebno ističemo sljedeće rečenice: "Najveći uspjeh ove brigade je što niti jedna osoba nije dovedena u bilo kakvu vezu sa eventualnim ratnim zločinom i to treba da nam bude na ponos svima. Kroz brigadu je prošlo 5 do 6 hiljada ljudi, nažalost na tom putu 227 ih je izgubilo živote dok je 287 ranjenih i povrijeđenih"

Nakon ovih obraćanja prigodne recitacije izveo je glumac Irfan Kasumović iz Tuzle, a posebne emocije kod prisutnih je pobudilo izvođenje ratne pjesme o gračaničkim "Škorpionima", koju je otpjevao Sead Duraković – Plovak uz muzičku pratnju mladog Kenana Mehića.

19. 9. 2018.

Poruka bivših radnika "Fortune": "Stečajna mafija nas uništava, ali ćemo se boriti i silom ako treba"

Grupa od 917 bivših radnika Fabrike obuće "Fortuna" iz Gračanice od ove kompanije još uvijek nije ostvarila svoja potraživanja. Odlazak u penziju za njih je još uvijek nedosanjani san, ali poručuju da će se za svoja prava boriti, ako treba i silom, jer više nemaju šta izgubiti. Prije nekoliko dana otkazana je i treća sjednica Skupštine povjerenika na kojoj je trebalo da se izabere Odbor povjerenika. Za trenutno stanje nekadašnji radnici krive Općinski sud u Tuzli koji, prema njihovim tvrdnjama, koči cjelokupan postupak. Ranija potraživanja radnika od "Fortune" u stečaju iznosila su 19.374.000 konvertibilnih maraka, ali je odlukom nadležnog suda na kraju utvrđena suma od 2.063.000 KM. Međutim, ni dvije godine nakon pokretanja stečajnog postupka radnici "Fortune" nisu dobili svoj novac u vidu plaće, uplate doprinosa ili uvezivanja radnog staža.

Zbog organizovanog kriminala uprave u gračaničkoj Fortuni krajem prošle godine po-

tvrđena je optužnica protiv nekoliko osoba, među kojima je i bivši direktor Safet Pjanić. On je na kraju osuđen na pet godina zatvora. Pjanić se još uvijek nalazi na slobodi, a kada će biti upućen na izdržavanje zatvorske kazne zasad nije poznato. (Izvor: Kliks. ba)

26. 9. 2018.

Održana 22. sjednica Općinskog vijeća Gračanica: vijećnici nisu postavljali pitanja "zbog predizborne kampanje!?"

Usvojena je Odluka o produžavanju perioda provođenja Lokalnog akcionog plana zaštite životne sredine općine Gračanica, te nekoliko izvještaja: o realizaciji Lokalnog akcionog plana zaštite životne sredine općine Gračanica (LEAP) za 2017. godinu; o realizaciji Plana kapitalnih investicija za 2017. godinu; o realizaciji MEG projekta. Na dnevnom redu su bile "i prošle" još i dvije kraće informacije: o realizaciji projekta vodovodne i kanalizacione mreže iz sredstava kredita EIB; o starim i iznemoglim licima u stanju socijalne potrebe na području općine Gračanica.

26. 9. 2018

Učiteljica Amra Fazlić iz Osnovne škole "Hasan Kikić" dobitnica UNICEF-ove nagrade "Šampioni inkluzije"...

T...koja se dodjeljuje pojedincima i udruženjima iz Bosne i Hercegovine za doprinos socijalnoj inkluziji djece s poštekoćama u razvoju. Evo šta stoji u obrazloženju povodom dodjele te nagrade UNICEF-a: "Njeni učenici su djevojčice i dječaci IV razreda, a među njima je i dječak sa autizmom. Amira svaki dan svojim primjerom pokazuje kako je moguće da se upravo ovaj dječak ne osjeća drugačijim od svojih drugara i drugarica iz razreda. Dječak je postigao fenomenalne rezultate i u odnosu na svoje drugare se ne osjeća isključenim. Učiteljica je zaslužna za stvaranje podržavajuće klime u razredu koja je rezultirala ovim uspjesima. Na tome su

izuzetno zahvalni roditelji koji imaju odličnu saradnju sa učiteljicom i cijelim razredom". (Gračanički.ba)

29. 9. 2018.

Deveta izložba stočarstva "Gračanica – Doboj Istok" u Stjepan Polju

Organizator i utemeljitelj ove manifestacije je Zemljoradnička zadruga "Gračanka" u partnerstvu sa navedene dvije općine. Ulazeći polahko u tradiciju, iz godine u godinu privlači sve više i izlagača i posjetilaca. To je pokazala i ovogodišnja izložba. Dan prije zvaničnog otvaranja u Dershani Osman-kapetanove medrese održano je predavanje i prezentacija mesnih pasmina goveda salers i limuzin u sistemu "Krava tele". Potom je upriličeno branje, vaganje i predstavljanje ogleda "Pionjer" hibrida kukuruza na oglednoj parceli u Gračanici. Nakon otvaranja Izložbe i prigodnog obraćanja zvaničnika i gostiju, između ostalog, priređena je demonstracija, pravljenja pekmeza na tradicionalan način, zatim branje, vaganje i predstavljanje ogleda "Pionjer" hibrida kukuruza na oglednoj parceli u Stjepan Polju, praktična demonstracija obrade papaka kod muznih grla. Posebnu pažnju privuklo je proglašenje najboljih grla po kategorijama i njihovo predstavljanje u izložbenom krugu, te prezentiranje rezultata sa spomenutih oglednih parcela kukuruza. Izložbu su uljepšali nastupi kulturno-umjetničkih društava sa svojim programima.

4. 10. 2018.

U Općoj bolnici "Dr. Mustafa Beganović" otvoren kabinet za CT i RTG dijagnostiku.

Ovoj bolnici gravitira nekoliko desetina hiljada pacijenata iz općina Gračanica, Doboj Istok, Gradačac, Srebrenik i Lukavac. Vrijednost investicije u opremanje prostora i nabavku CT i RTG aparata iznosi oko 750.000 KM. U Bolnici očekuju značajno poboljšanje usluga i skraćivanje famoznih višemjesečnih listi čekanja na pregled. Direktor bolnice dr.

Almir Sakić dodao je da je instaliranjem novog lifta, kako je rekao direktor bolnice dr. Almir Sakić, bit će olakšan i transport pacijenata do dijagnostičkog prostora.

7. 10. 2018.

Opći parlamentarni izbori 2018.

...na području općine Gračanica obavljani su na 63 registrovana biračka mjesta. Od ukupnog broja od 41.697 registrovanih birača, na glasanje je izašlo 18.299 ili 43,89%. (važećih listića 16.996). Za glasove se borilo 19 stranaka. Izbori su prošli bez posebnih problema. Izlaznost je ispod prosjeka BiH. I na općini Gračanica zabilježen je povećanje broja nevažećih listića. (Rezultate izbora donosimo u posebnom prilogu u rubrici "Teme" u ovom broju našeg časopisa)

9. 10. 2018.

Umro Borislav Žuža, nekadašnji predsjednik opštine Gračanica

Potiče iz stare srpske pravoslavne porodice iz Gornje Lohinje, rođen je 1941. godine u Gračanici, gdje je završio osnovnu školu. Gimnaziju je završio u Doboju, a ekonomski fakultet u Beogradu.. Prvo zaposlenje kao mlad ekonomista dobio je u "Bosna azbestu" u Bosanskom Petrovom Selu, odakle je prešao na poslove plana i analize u Trgovačko preduzeće "Ozrenka" u Gračanici. Još kao srednjoškolar i student bio je aktivan sportista, talentovan rukometaš, dugo vremena prvotimac prve generacije Rukometnog kluba "Partizan" u Gračanici. Uz to se isticao u društveno-političkom životu Gračanice. Između ostalog, bio je i na funkciji potpredsjednika opštine Gračanica (od 1974 -1978), a zatim i na funkciji predsjednika u mandatu 1978 – 1982. godina. Dok se nalazio na funkciji predsjednika opštine, bio je na čelu Odbora za izgradnju druge faze doma kulture u Gračanici. Po isteku mandata, vratio se u "Ozrenku", odakle je ubrzo, pa partijskom zadatku prešao na dužnost direktora "Graplasta" u Gračanici. Uspio je to preduzeće integrisati sa Koks-

rom “Boris Kidrič” u Lukavcu i oživjeti proizvodnju koja je bila u kolapsu. Do rata je radio na komercijalnim poslovima Koksare i gračaničkog “Koka produkta”. Vrijeme ratno proveo je u Srbiji, najviše u Beogradu. Vratio se u Gračanicu 2000. godine i jedno vrijeme radio u komercijali “Koka produkta”. Penzionisan je 2006. godine. Poslije rata, jedno vrijeme radio je na komercijalnim poslovima u “Koka produktu” u u Gračanici, odakle je i penzionisan. Poslije kraće bolesti, umro je 9. 10., a ukopan u mjesnom pravoslavnom groblju 11. 10. 2018. godine.

11. 10. 2018.

U gračaničkoj Općoj bolnici “Dr. Mustafa Beganović” 3 nova hemodijalizna aparata.

Riječ je o donaciji humanitarne organizacije Sharjah Charity International iz Ujedinjenih Arapskih Emirata u vrijednosti od 91.1999 KM. Nakon njihovog instaliranja bit će znatno poboljšane usluge ovog hemodijaliznog centra.

13. 10. 2018.

Bosanska soba i u Donjoj Orahovici...

.. koristit će za rad Udruženja žena “Orahovica Donja”. To je rezultat marljivog i posvećenog rada žena Donje Orahovice izjavila je predsjednica Udruženja Nermina Alihodžić. Prostorije je ustupila Mjesna zajednica, a sredstva za njeno opremanje Općina Gračanica i same članice Udruženja.

19. 10. 2018.

“Zlatne ruke Gračanice” naziv je ovogodišnjeg sajma ženskog poduzetništva...

...koji se po drugi puta organizuje u centru Gračanice pod pokroviteljstvom Općine Gračanica i uz učešće nekoliko domaćih i gostujućih udruženja žena iz općina Srebrenik, Lukavac, Modriča, Tuzla, Žepče, Kalesija, te iz gračaničkih srednjih škola. Kako je rečeno na otvaranju, cilj sajma je afirmacija ženskog

poduzetništva i biznisa koje vode žene nižih prihoda, produbljuvanje procesa, prepoznavanje potrebe žena poduzetnica u lokalnoj sredini, te pružanje adekvatne podrške i uklanjanje nepotrebnih administrativnih prepreka. Želja je svih da Sajam postane tradicionalna manifestacija. Kulturno-zabavnim programom sajam su uveličali članovi ovih udruženja, ali i učenici srednjih škola.

25. 10. 2018.

Rukometni veterani srdačno dočekali profesora Branka Jankovića, utemeljitelja rukometnog sporta u Gračanici.

Za njegovo ime, kako je rečeno na ovom susretu, vežu se počeci rukometa sredinom pedesetih godina prošlog vijeka. “Došao sam iz Dervente kao profesor u Gračanicu. Bavo sam se fudbalom, atletikom i rukometom. O rukometu sam malo znao. Učio se ja pa onda učio i druge. Rukomet je ostao moja doživotna ljubav. Svojim najvećim uspjehom smatram ono rukometno igralište kod DTV “Partizan”. Nismo imali gdje da treniramo pa sam odlučio da se organizujemo i napravimo sebi igralište. Zamišljeno je bilo da tu budu dva-tri terena, za rukomet, košarku, odbojku i ostale sportove. Napravili smo teren, počeli trenirati, igrati utakmice, a ubrzo smo formirali i klub...”, samo je dio zanimljive priče ovog sportskog entuzijaste i pedagoga, koji je ostao u trajnom sjećanju ljubitelja sporta u Gračanici. Inače, imao je dugu i uspješnu sportsku i akademsku karijeru. Igrao je rukomet, bio trener pisao knjige i priručnike, stvarao evropske, svjetske i olimpijske prve... (Izvor: Radio Gračanica)

26. i 27. 10. 2018.

U organizaciji Umjetničkog obrazovnog centra održan 6. narodni muzički festival u Gračanici...

Prve večeri predstavila su se kulturno-umjetnička društva, folklorne sekcije, plesači i muzičari, dok je druge večeri organizovana

prezentacija dječijeg stvaralaštva. Na manifestaciji je uzelo učešća desetak kulturno-umjetničkih društava i grupa s područja općine Gračanica.

30. 10. 2018.

Gračanički fotograf Hasan Puškar – Soha, osvojio je prvu nagradu na 51. danima BiH fotografije za najbolju monohrom fotografiju u 2018. godini.

Druženje fotografa je održano u Trebinju. Koračajući očevim stopama, i Hasanova kćerka Emina, nedavno je dobila priznanje na internacionalnom bijenalu mladih fotografa u Luksemburgu. Neka umjetnička ostvarenja Hasana Puškara, koji se, inače bavi i poezijom (fotografije i pjesme) objavljene su i na stranicama ovog časopisa.

31. 10. 2018.

Održana 23. sjednica Općinskog vijeća Gračanica: rebalans Budžeta za 2018., projekcije Budžeta za 2019.

Budžet za tekuću godinu “rebalansiran” je kao i obično—uz pokoju primjedbu vijećnika uvećanjem za 413.370 KM i pošto je dobio ve-

ćinu, po rebalansu, iznosi ukupno 13.811.305 KM. Prema projekcijama za 2019., općina ulazi sa nešto manjim Budžetom, koji bi trebalo da iznosi 12.744.034 KM. “Ostavljeno” je građanima da o tome “raspravljaju” do 5. 12. 2018., do kada je zvanično otvorena javna rasprava o Nacrtu Budžeta. Od značajnijih tačaka na ovoj sjednici, vrijedi samo spomenuti Informaciju o stanju iz oblasti vodosnabdijevanja na području općine Gračanica, koja je usvojena takoreći bez rasprave.

10. 11. 2018.

U Lukavici kod Gračanice, pogon za proizvodnju gornjih dijelova obuće

U nekadašnjem proizvodnom pogonu Fabrike obuće “Fortuna” koja je u stečaju, proizvodnju je pokrenula firma **Progetti Bosnia**, iz Lipnice kod Tuzle. U pogonu su uposlene 54 radnice iz Lukavice, koje su u većini nekada radile za “Fortunu”, a sada za renomirani svjetski brend Gucci. Uskoro se planira proširenje pogona i novo zapošljavanje na radost mještana ovog u ratu postradalog naselja, koje je uveliko zahvaćeno valom iseljavanja. Samo otvaranjem ovakvih pogona moguće je zaustaviti te nepovoljne trendove.